



PERSEVERA

Un página di kurashámentu i guía spiritual pa
di Scouting Antiano



Óktober 2013

Edishon 33 Aña 3

Un alerta... New Age

Ta difísil pa bisa kiko ta "New Age". Un religion? Un filosofía? Un manera di biba? Tal bes tur kos pareu. Un sorto di pensamentu ku ta afektá tantu religion, mentalidat i forma di biba. Un pensamentu den kual no tin "si - si; no - no". Aki tantu "si" komo "no" ta habitá banda di otro, e bèrdat banda di mentira, mentira den bèrdat i bèrdat den mentira. Un konfushon ideal, un bruhamentu perfekto. Kiko ta bon? Loke bo ta kere ku ta bon. Kiko ta malu? Solamente loke bo ta haña ku ta malu. Den "New Age" tin lugá pa tur religion i pa tur manera di biba, tin espasio pa kada dios, pa kada angel i pa kada demoño. Den poko tempu e "sekat" monstruoso akí a penetrá den tur nashon i den tur aria. El a hasi su impakto speshalmente den famia, den salú, den ekologia, músika, spiritualidat, kuminda, edukashon, medisina i den kustumbenan general i hasta den manera di nase i di muri di e ser humano, anto konsekuentemente den leinan i derechonan. Kultura kristian, mas ku kualke otro, a keda supstituí ku kultura di "New Age". E "octopus" aki "New Age". E "sekat" aki a guli kultura kristian komo promé, pero su hamber no a keda satisfasé ainda. Awor, ku bastante energia e ta kresiendo pa bora e otro kulturanan basá riba monoteismo, esta riba Fe den un Dios so, e Dios personal, e Dios kreador, e Dios Tata. "New Age" ta birando popular den ambientenan hudiu i mòslem. E ta birando kasi un eksigensia i un kondishon pa sera konvenianan internashonal. Naturalmente tur esaki ta paketé den e palabra bunita "toleransha". Un pais ku no ta aprobá "matrimonionan homoseksual" ta intolerante i ta kore peliger di wòrdu isolá polítikamente i ekonómikamente. Un pais ku no ta bai di akuerdo ku aborto òf ku eutanasia, ta un pais ku nota respetá derechonan i p'esei e ta wòrdu preshoná pa kambia su aktitut arogante. Un polítiko no mag di manifestá su fe, òf mester ta un budista, òf algu eksótiko-oriental. Toleransha a bira un teror, un aseptashon obligatorio di aktitut i di pensamentu kontrario di fe i kultura di pueblo. Un empleado di gobièrnu no mag di nenga "kasa" un pareha homoseksual, un médiko

no mag di nenga hasi aborto, miéntras ku un kunukero ta bai prison pasobra e la maltratá un porko. Toleransha di siglo XXI a hinka un pastor Anglikano den prison, pasobra el a sita Santa Skritura kontra homoseksualidat. E mesun toleransha akí a pronunsiá un sentensia, dor di korte supremo di Estádos Unídos, pa basha monumento di Dies Mandamentunan di Dios abou, pasobra e ta ofensivo. E mesun toleransha a prohibí un mucha di bai skol ku mensahe kristian riba su "T-shirt" i a prohibí pa e muhénan mòslem bisti lensu na kabes. Toleransha ta un palabra ku a bira perverso, meskos ku henter e ideologia di "New Age". E "New Age" ta perverso. E "bichi" di "New Age" a kaba tambe ku e contenido di e palabra "amor". Awor e ta un palabra "kalbas", pues fofo i sin contenido, un palabra ku ta sirbi pa kiko ku ta. E siguiente palabra ku ya a keda afektá ta e palabra "Dios". No ta algu straño ku e ideologia akí ta destruí contenido di palabranan klave di humanidat? No, ta trata di sembra un konfushon, di kita bèrdat, i planta mentira? Òf tal bes e akusashonnan akí ku mi ta hasi ta sin base? Por tin un peliger den algu ku ta holer sensia oriental i ku tin zonido di músika suave i relahante? Ta posibel pa algu ku ta papia di angelnan menasá humanidat mas ku Beibel mes. Maske e mes no ta un religion, tòg "New Age" ta un religion; maske e no ta pertenesé na un filosofía, tòg e tin un vishon di hende i di mundu, i un yabi di interpretashon; maske e no ta siensia, e ta buska apoyo den e leinan sientífiko, hasta si e tin ku buska nan meimei di streanan. E ta un sorto di neblina gigantesko i konfuso ku ta kontené esoterismo, okultismo, pensamentu mágiko i místiko, si ta trata di sekretonan di bida, un tiki di kristianismo, anto tur esei bruá den e ideanan di astrofísika. Esaki ta e definishon di mas asertá di "New Age": un neblina, kada bes mas denso, ku ta sofoká mente i alma di hendenan, ta korumpí hasta e siensia mes komo tal, sin protesta di sientífikonan.

